



JOVENTUT
EUROPEA
FEDERALISTA



JEUNES
EUROPÉENS
TOULOUSE

Perpinhan, lo 21 de mai de 2021

L'ADMINISTRACION COMUNALA DE PERPINHAN REFUSA LAS INTERVENCIONS DELS JOVES EUROPEÛS SUL TERRITÒRI DE SA CIUTAT

Desiroses de far viure lo projècte europèu endacòm mai qu'a Brussèlas, Strasborg o París, los Jeunes Européens Toulouse e la Joventut Europea Federalista de Catalunya an organizat a Perpinhan, del 20 al 23 de mai, una seria d'activitats ligadas amb l'identitat catalana e l'Union europèa.

Dins l'encastre d'aquel eveniment, las doas seccions avián previst de realizar d'accions per carrièras lo divendres 21 de mai e lo dissabte 22 de mai al Castelet e al mercat Cassanyes. La tòca èra de parlar d'Euròpa, d'escambiar suls enjòcs e las escomesas que coneis per tal de far conèisser lo foncionament de l'UE. Las accions se devián adreçar als mai joves d'un biais ludic e pedagogic.

Diluns 17 de mai, l'associacion faguèt una demanda d'autorizacion per manifestar temporàriament sul domeni public a la Prefectura dels Pirenèus Orientals. L'autoritat ballèt son acòrdi a condicion que sián respectadas las nòrmas sanitàrias e que siá aprovat per la comuna que recebèt una demanda l'endeman, dimars 18 de mai.

Dins la vesprada del dijòus 20 de mai, e aprèp aver presentat per e-corrièr los lòcs exactes de las accions (ja precisats dins la demanda prefectoral), lo contengut de las activitats organizadas e los tèmas abordats amb los passants, la demanda es estada refusada tot ben que las associacions avián respondut a las darrièras doas questions mai qu'inapropriadas.

La lei de França non precisa de relambi per demandar una autorizacion de manifestacion temporària sus l'espaci public. Lo refús d'una manifestacion se pòt justificar sonque per un risc d'atac a la securitat dels bens e de las personas o se la manifestacion prejudícia las libertats d'autras gents. Lo motiu avançat per la comuna de Perpinhan per refusar nòstra demanda es lo seguent : « demanda facha del jorn a l'endeman ». En sabent qu'es enganaire, nos demandam doncas : es que parlar d'Euròpa prejudícia la securitat publica ?



JOVENTUT
EUROPEA
FEDERALISTA



JEUNES
EUROPÉENS
TOULOUSE

Los Jeunes Européens Toulouse e la Joventut Europea Federalista de Catalunya faguèron la demanda d'autorizacion prefectoral a lo diluns pel divendres, valent a dire 4 jorns abans la debuta de l'accion per carrièra. La comuna de Perpignan es estada avertida tres jorns a l'avança. En l'espaci de 4 ans, la prefectura de Garona-Nauta refusèt pas jamai una autorizacion atal als Jeunes Européens Toulouse. Parièr per la Joventut Europea Federalista de Catalunya.

Las doas associacions rementan que lo drech de manifestar es un drech fonamental garantit per la Declaracion universala dels dreches umans de 1948. Rementan tanben que l'autorizacion de manifestar pòt pas jamai èsser refusada per motius politics e qu'aquò constituís un prejudici grèu a la libertat d'expression, d'opinion e de manifestacion. La comuna de Perpignan, dirigida per lo Rassemblement National nos empacha de manifestar per parlar d'Euròpa. Los que pèrdon son los ciutadans e las ciutadinas perpignanencs privats de s'exprimir e de debatre sus Euròpa, privats d'un debat politic, privats de lors libertats. En proïbissent las accions per carrièras, la comuna restrenh silenciosament la diversitat d'opinion, d'idèas e *in fine* las libertats. Un còp de mai l'extrèma drecha nos mostra lo rapòrt singular qu'entreten amb la libertat d'expression e de manifestacion.

“ Nul ne doit être inquiété pour ses opinions, même religieuses, pourvu que leur manifestation ne trouble pas l'ordre public établi par la Loi. “

Article 10 de la Declaracion dels Dreches de l'Òme